

PM: Rakyat perlu fahami sejarah bangsa sendiri

U.M. 5-6 JULI 1977

1

KUALA LUMPUR 7 Julai — Perdana Menteri, Dato' Sri Dr. Mahathir Mohamad berkata hari ini, rakyat Malaysia perlu memahami sejarah bangsanya sendiri kerana sejarah akan memberi mereka tenaga dan landasan dalam menempa tamadun baru.

Menurut beliau, memuliakan seseorang tokoh bukanlah bermakna mengagung-agungkan atau mendewa-dewakannya tetapi untuk memperlihatkan kepada rakyat khususnya generasi muda mengenai perjuangan, pengorbanan serta harapan seorang pemimpin terhadap negara dan bangsanya.

Almarhum Tunku Abdul Rahman Putra Al-Haj, kata Dr. Mahathir, adalah salah seorang daripada pemimpin negara yang sewajarnya dikenang kerana tanpa jalan yang dirintis olehnya, Malaysia seperti hari ini tidak akan wujud.

Oleh itu, kata Perdana Menteri, pelancaran Memorial Tunku Abdul Rahman Putra di Bangunan Residen iaitu kediaman pertama Almarhum sebagai Ketua Menteri dan Perdana Menteri merupakan satu usaha kerajaan dan rakyat untuk memperingati seorang pemimpin negara yang agung.

Berucap merasmikan pe-

lancaran projek memorial itu, Dr. Mahathir berkata, adalah penting bagi seluruh rakyat dan setiap generasi akan datang menginsafi perjuangan dan pengorbanan yang dicurahkan oleh Almarhum kepada negara dan bangsa Malaysia.

Memahami

"Sebenarnya, memahami sejarah Almarhum Tunku bermakna memahami sejarah perjuangan kemerdekaan bangsa Malaysia ...sebab itulah pemilihan Bangunan Residen sebagai pusat kompleks memorial ini amat sesuai kerana banyak sejarah dan perbincangan penting yang menentukan haluan dan masa depan negara dibincangkan dan diputuskan di sini," ujar beliau.

Perdana Menteri mengingatkan, keagungan sesuatu bangsa itu ditentukan oleh kepentingan yang diberikan kepada sejarah.

Sejarah, katanya, merupakan suatu khazanah yang amat bernilai kerana ia adalah gedung pengalaman.

Beliau berkata, bangsa yang agung juga adalah bangsa yang menempa sejarah dan yang mahu mempelajari daripada sejarah.